



和16
928
8



門 八 16
號
卷

普天忠憤全集卷之八

曲阜魯陽生孔氏編定

漢軍寶 璋 裁 臣

蒲圻覃廷楨蔭堂分校

太倉鮑文蔚貫參

夔州程正學文先參校

黃岡林郁鈞可廷

圻鄧人梓樹梧

立信論

張羅澄

孔子曰民無信不立凡以大義所在具此血誠始能立身天壤仁義之良生民原所固有然欲求民之信當立信於民他勿論論目前事方今天步艱難我國家為債事歛罄天下所蓄而傾之猶不足乃息借洋款年年積利成本由本加利未知何日方是了期於是關心時局者或上封章或據偉論均謂創銀行用鈔票可以生財而於外洋花紋紙亦可識其漏卮其識未嘗不卓然吾恐百姓私議以為又將誑我也昔咸豐年間改用鈔票頒之各省其初未嘗不可通行其繼也軍餉不能用庫款不能用捐官不能用完各項賦稅不能用後竟將鈔票三成折抵了事天下人尚嘖嘖然訟前日弊今復用鈔票設不予人以可信其勢必有所不順然則將如之何夫立木示信秦法以行請於京師各行省及通商口岸創立銀行使鈔票有可換銀之處則民以信其票用俄國潔鮮紙內加鈐記由一兩起數逐漸加至百兩止以便通用製機器刷印使奸民不能假則民愈信自軍餉以及一切賦稅皆可通用則民更無不

普天忠憤 卷八

信然各銀行所應存鉅款此時又何取償耶愚謂由戶部造成鈔票每省頒發百萬
大省或百餘萬飭督撫籌措實銀照八成申解繳部即從部頒之各銀行中再別籌
費益之然後持票換銀者皆不至空無以應則不必施信於民而民亦信矣如是而
天下利權皆操之朝廷可以時核其盈絀此一未始非生財之一道也此日民窮商
困國帑空需杞人憂天沈幾觀變所熟籌以勵相我國家者正未可更僕數也第就
此一事論之亦無有人焉倡是議者何不思外洋一紙花紋我商民能以百萬實銀
易之何哉其法嚴而信立故也如必用鈔票須特創嚴法凡偽造鈔票至十金者梟
首百金者坐其家千金者族鄰舍知而不舉發者連坐有出首偽造証據確然者賞
如其偽造之數則鈔無最偽風行草野天下之大信以彰庶不再蹈咸豐朝用鈔之
弊予當軸者盍一籌之

作此後繼思遍設銀河未免紛紛不如戶部造成鈔票頒之各省飭票號當舖照
九成繳銀領票官私皆可通用富商貧一咸之利皆將繳銀買非所償兵費三百
兆兩年即可了結國家但能予人以可信則一片空紙可歸實用是用銀反不如
用鈔之便誰不樂從請思外洋花票換我國實銀獲利三倍可以了然

張羅澄自記

代上張香帥書

楚南劉錫爵

竊某一介武夫毫無知識生性愚魯幼受書不能守章句以貧故遂中輟於是荷戈
從戎隨左支襄轉戰於浙閩燕晉秦隴新疆素志以馬革裹尸為幸衝鋒臨陣奮不
顧身瀕於危出死入生者屢矣古云死生有命富貴在天旨哉言乎某於訓練部曲
時恒以身親之事訓之鼓其勇敢之氣教以忠義之方夫得失成敗雖關天數然人
勝天未嘗不雜以人事人既有生何嘗無死死於敵寇與死於軍法有間臨敵誓死
不特不死且斗大金印如取如携王侯將相豈有種耶臨陣退縮不獨必死猶有
辜鴻毛泰山之分宜審慎而體行之卑鄙勇頑知自奮聞命即起勞險不辭視公
如私義形於色觀大致緩急可恃頃聞和約已換有割臺澎湖倭之說竊聞伊等憤
憤如失已物而某食味寢不安席數日矣但職微位卑徒呼負負恨無回天之力陡
增失地之傷涕泗交流不勝悲痛至其中有無奇謀無從窺其崖畧大人 朝廷柱
石天下長城惟倚昇之隆無有出其右者意者必有 綸綍頒來 垂詢利害惟大
人老謀碩畫籌周詳必有確見其萬全而無憾者 聖明在上當不至拒忠言而納
邪說君臣一德轉危為安某自顧何人焉敢妄參末議然事關大局身受 國恩一
息尚存何忍自緘默就大概言之有不可割者三不可許者三謹為大人縷晰陳之
割臺灣澎湖既失南洋之屏藩又失中華之國體倘各國尤而效之將至割不勝

割也不可許者一土地膏腴一年三種民情强悍最宜於兵藉寇兵齎盜糧莫此為甚不可割者二五金煤礦偏地皆然開財源裕國課易如探囊取物不可割者三兵費二萬萬兩是豕魚而縱之淵駸駸而縱之叢練兵漆船製器無往而不宜生東隣無厭之索啓西國輕視之心不可許者一設機器造土貨精而速價值賤而廉耗民財奪民食物窮則變倘勝廣復出欲無潢池之患能乎不可許者二內地通商必設洋官有洋官必有洋兵設一旦與民相競爭鬪然而入防不勝防且貨物存棧不納稅釐自倭作備各國必步其後塵行見洋物日多洋稅日減不可許者三為今之計與其暫和養癰以貽患曷若乘機救弊以補偏夫人才乃應運而生有大變則大才生有小變則小才生天生才一視變之大小以為程益非常之時必出非常之人有非常之人然後有非常之機有非常之機然後有非常之功古今昭昭而無或爽者也開闢以來交接之廣外侮之亟強隣之多教堂洋行鱗集於中華輪船火車馳騁於水陸齟齬周旋無虛日籌防戒備無間時未有如今日之甚者誠堯舜禹湯所不及料文武周公亦莫可如何也先是明季葡萄牙佔澳門乃為中外交涉之萌芽已而道光禁烟之役咸豐天津之役同治臺灣之役在當事者不悉洋情不審虛實不分大小不辨強弱輒以柔遠之道待之長其猖狂之欲增其覬覦之心琉球發禍及越南越南亡波及緬甸緬甸滅暹及暹羅顧朝鮮之危如累卵豈一朝一夕哉蓋其由來久矣不東併於日必北併於俄何者前廢琉球我無存邪封衛之心彼有得隴望蜀之想今日藩籬盡撤堂奧洞開唇亡齒寒將及腹地五胡亂華之勢不復覩於今日耶環球俄最大法最強德新興英美最富然持盈保泰志在通商無心關土俄則不然歐州膏腴不過坏土羣雄鼎峙拓地為難乃於亞洲之北境增戎兵設鐵路經之營之不遺餘力今見日本佔奉天未嘗不追悔讓人先着於是調船添兵孽孽不倦割奉天則否則割臺灣則唯賠兵費則袖手旁觀加兵費又一詞不贊其屬意於東三省明矣忍而不發俟趙舉秦罷然後乘其敝也至於法之劫為虐得寸思尺尤在意中將來大吞小強併弱將創五洲混一之局豈非非常之時乎大人聰明天授忠義性成士民莫不慕其德部曲莫不切其恩無論識與不識僉曰三代以下天蓋特委重於大人文有造於中國之民豈止三江兩湖之蒼生已哉風聞臺民眾口一詞不謀而合誓以戰死而失臺不肯不戰而讓臺眾志成城欲得倭人食其肉寢其皮無噍類而後已可知列聖無分畛域一視同仁恩德入人至深不然雖動之以名利威之以刑罰猶不易得況出於至誠者乎此殆列聖在天之靈使中國得一大轉機也何以言之日本較勢比力纔及我之十一若夫主客勞逸我猶勝算獨操顧履蹶而不振者何哉實謀之不善耳開戰之始彼之海軍星馳電掣縱橫自如如入無人之境我軍深居簡出受制於人大犯兵家之忌陸師將不得人濫竽充

充數牛驥同年聞風逃潰至於剗削兵無戰心益無論已且兵則新招驟募訓練未精技藝生疏市人與戰披戰以氣為勝負准軍潰散於前相軍氣沮於後委靡不振銳氣盡消此皆致敗之由也臺灣如果火器足數糧餉無缺上下又同仇敵愾倭人斷難越雷池一步何則船之壘不及人心固炮之利不及人心廣設伏以挫其鋒用奇以奪其魄倭人其奈臺灣何哉倘不能得志於臺必改弦更張仍向朝廷追索之不得仍從事於干戈彼時不戰不能欲和不得願我休養日久操練漸精天子降罪己之詔廷臣嚴議和之條鼓勵忠勇上下一心失之東隅收之桑榆未可知也借台灣以收奉天借奉天以存朝鮮借朝鮮以疲日本借日本以懾西洋因禍為福轉弱為強在此一舉時不可失勇者在此時以圖功機不可忽智者貴見機以謀事向使反悔出自朝廷則曲在我授人責言今反悔出自臺民眾怒難犯天下皆知人心向背於國何尤倭人若知難而退戰局可不重開否則嚴備邊防以靜劑動夫利鈍本無常數勝負時有轉機千載一時豈非非常之機乎臺懸海中假使援斷糧絕雖良平之智責育之勇亦無所施宜作綢繆未雨之謀亡羊補牢之計民倡其首官贊其成民戰於前官助於後於各海口密布水雷使敵如履虎尾春冰久之必改途易轍不復垂涎俾已失之河山安如磐石存亡繼絕功莫大焉較焉文淵也乎交趾武鄉侯之拓蠻方有過之無不及矣豈非非常之功乎某之妄獻芻蕘者非敢專執邊疆以大局為孤注確見割地決難弭患賠費必難久安非發憤為雄不能自立矣今一變猶可有為倘再因循事機坐失待至元氣日傷人才日少兵備日弛不獨不能戰不能守且不能和彼族協以謀我斯為大敵悔何及乎大人廣開言路不責言之不當但責知而不言敬竭蠢愚以備采擇是否有當伏乞卓裁

上張香帥書

葉耀光

生草茅下士寶牘書生既三昧以未通復片長之不具輒以叢雨之志慕伊呂之風功業雖以際遇而殊學術要無古今之異軒衡寰宇感慨頻生觀鄰邦之日強未嘗不深憂時之思客夏倭人肇釁初據藩封繼侵邊圉凡我食毛踐土莫不敵愾同仇况生向受國恩安可不思報效蒿目時艱不安寢食每自拔劍斫地搔首問天自憾為貧困所羈請纓乏路當今之世雖具箕比之忠誠管樂之才畧卒不免為資格所限况以生之駑駘不才兼之寒素亢直顧欲干冒當路上瀆威嚴鮮有不遭擯斥者矣是以裹足不前低徊鬱勃然今寇患深矣寸中焦灼有萬不能已於言者數日前聞傳倭兵南下犯侵登萊江蘇相距匪遙防務尤為緊急憲台勵精圖治固已籌畫無遺而生員志切同仇安忍終於緘默竊不自揣敢竭鄙忱籌禦倭策十條以作芻蕘之獻謹臚舉如左上供采擇一曰習測繪以明地勢用兵必先鄉導行軍首重地形孫子曰不知山林險阻川澤之形者不能行軍故地形者兵之補助料敵制勝計險阨遠近上將之道也測會一術能探地形之奧行軍

者不可視為緩圖也苟通乎此得以行預布置趨利避害先立於不敗之地以待敵之來
行營築壘之要莫踰於此故曰先處戰地而待敵者佚後處戰地而趨戰者勞今我與倭
人戰係敵來攻非我趨戰其勞逸之勢判若天淵前者平義安九鳳岫金復海蓋旅威諸
處之失何嘗非久守待敵第以諸將地勢不明無從布置敵兵遠道而來數日之間遽行
攻破何其易也其致敗之由雖不止此而不能扼要據守則固然也倭人步武西法能實
事求是聞其兵首皆通算術圖地臨陣以儀器測量炮槍有准按中華地圖外人多有刊
售沿海各省尤為詳細非從舊圖摹出良由實測而來平日外人遊歷所至將山陸川涓
測繪以歸一旦有事若舊地重遊故其遠近險易皆所深知我華將弁素昧測繪之學於
本國地勢尚覺茫然遑問鄰境及兩軍交鋒彼則扼要據險出奇抄襲我國能戰之師莫若
宋軍亦僅紫死寨打硬仗暗擊盲撞一味磨戰大有主客倒置之勢故每戰敗北卒喪師
失地以貽君父之憂何處設伏何處扼抄何為爭地何為衝地一切營陣利害非通測
繪無以預知為今之計無論和戰均宜於省垣設立測繪學堂延精於測繪兼曉戎機者
為教習飭營哨等弁赴堂肄習兼購詳細地圖隨時考証所習課程為目前急救計者務
擇淺易而求速效其目凡七一用表代乘除法二開方勾股比例淺法三三角八綫四用
指南針測量法五遙測敵軍槍炮法六繪行軍草圖法七訪求各地情形已上七種為至
淺之術以中人之資肄習三月必能通曉若別去二條則更易從事庶行軍處地有所恃

矣此所以發明地勢宜先測習繪也二曰選槍炮以利器械古昔之戰短兵則于士刀矛
長兵惟張天炮石初未有以炮火為利器也近今戰陣惟槍炮是務一炮之彈連擊二十
里一槍之彈擊及三里苟槍炮猛利施放有准即為勁旅子曰工欲善其事必先利其器
是錯曰器械不利以卒予敵故欲臨敵制勝非選利器不可考各國常用火炮曰克羅伯
曰阿姆斯脫郎此皆炮師之名因人呼物名遂以傳遞以傳炮彈之重自數磅以至千磅
炮之大者體重四墩彈四十磅至遠十二里由是而八十磅百二十磅百八十磅以至二
十五磅炮體重十八墩致遠二十七里極大者炮體百墩彈重二千磅口徑尺有半可謂
鉅矣英人兼用前膛德軍善用後膛而後膛亦德國最精德國克羅伯後膛炮用一橫門
簡而固英國阿姆斯脫郎後膛炮其事較險然各種後膛新炮確有數益曰有准曰及遠
曰力猛曰有有來復綫曰開放靈捷曰有升降各機而舊炮有數弊曰差大曰力小曰施
放遲笨曰拋物綫太曲臨陣之際勝敗利鈍間不容髮有一事遜敵則貽誤匪淺又格林
各快炮為急救利器炮機僅一旋耳倉卒之間彈如雨下軍中不可少也至火槍之製大
畧同歐美各國多產名槍要以德之毛瑟法之葛刺士為最各擊最遠界一千一百六十
步其次如德之衛爾德英之馬械呢亨利各擊千步又次如美之黎意林明敦瑞之屈得
利各擊六七百步此皆步槍也而馬槍之製畧小美國溫這司馬槍有十三響十七響兩
種雖擊遠僅一里半里之間而彈捷槍輕最利為兵之用伏查各營用舊槍尚多祇堪供
普天忠貞

巡緝不足以禦強敵目今防務戒嚴務必隨時更換統帶等弁於收領軍火尤宜詳加查驗遇有竄損槍炮隨時易出以免貽誤臨時近有以抬槍管粗彈大謂勝於毛瑟者此昧於製造彈準之談也夫毛瑟槍彈最遠三里二里之遠已可傷人彈循螺絲旋出能破空氣阻力而槍輕彈捷命中推擊斷非抬槍能比一抬槍之放而毛瑟已數响以放欵笨不準之槍抵數响命中推擊之彈其勝負之數不辨自明此所以欲利器械宜先選槍炮也三日招工匠以精掘築掘者掘濠溝隱路掘地管窟穴掘地雷隧道也築者築城堡營壘築炮壘壘墉築坡堆壘岸也百餘年歐西各國競修武備槍炮之外莫急於此矣利器械所以擊人精掘築所以避人之擊二者並行不悖俗傳地營為掘築中之一端僅恃此技而不練掘築全法必為敵困故坡堆濠壘所宜講求焉營兵雖能掘築而技不專精舊式壘壘尤難禦砲工匠素嫻工作規矩繩墨訓練易精工匠既精然後教兵事半功倍不勞而成招工之法凡軍一萬招工工三百五十人運土木工五十人銅鐵雜匠二十人備鋼鑿四千柄鋼鑿半之他如地道掘器向盤水平軟尺地圖藥水等一物不可少其土木工四百名以溝壘地營諸法凡尺量角度規矩繩墨幾何形勢均合算理其圖形造法悉載生所著陸軍芻言因其繁碎茲不贅述掘築之際令兵隨同習練較工之時匠入兵隊操演查各國軍制俄國陸軍人各備取土之器丹國軍營帶器者半美國營規每抽兩隊輪帶掘器其他或車載鑿桶或另設工軍總舉各法惟俄最長而掘築營壘亦俄人最精然愚考

各國於地營地道之術講求日精皆取法於格致算術為兵家當務之急我華將弁從無知格算法者故通此絕少偶有一二武弁能畧曉掘築便為莫與抗手世俗之士一唱百和呼為名將西人間之無不竊笑前者平旅諸險失守雖以軍心不固亦以未精掘築所致嗚呼有平旅之險尚不足恃天下更有何險可恃乎哉地非不利也守非不久也將士軍實非不足多也一旦寇至惟委棄是務敵兵乘間轟擊軍士糜爛皆將之過也不仁莫大焉是平日辜負君恩不能孳孳求治將地營避之法訓練嫻習使軍士有恃無恐迨一經交兵而喪師辱國可勝嘆哉後之用兵者苟鑒此而矯其弊未為晚也昔法王拿破崙屢與與人戰拿破崙先至戰地預築營壘與人不能攻拿破崙大勝及拿破崙敗猶自悔未能多築營壘以至於此同治四年拿破崙第三下令操練掘地諸技況今砲火日精避已擊人之術非地營濠隨不可凡掘地營必擇要害衝地與溝壘相為表裏沿海一帶尤宜相地造築附近炮臺有唇齒輔車之勢縱使敵兵登岳不能長驅直入然築不如法與不築同掘築不精仍難禦炮此所以欲掘築宜先招工匠也四曰破成格以舉真才古人有言士賢為不用有國者之耻見賢而不能舉有司之過也天下人文之萃莫若士矣而儒生惟務帖括之學驅畢生之英精壯志消磨於八股之中而不知止其於富強王霸齋非所知也然天生人材不以時而異不以地而限野耕農築之流何時無之自捐納之途開而流品愈雜奔競之風靡而真才日鮮子產曰學而後入政今之良臣皆以政學者也

其入政而猶不學者無論矣唐相陸贄請臺閣長官各薦其屬宋司馬光請在位遠官各舉所知古之大臣莫不破格旁求以推賢進士為務方今時事多艱需才孔亟尤宜招至奇才異能之以收羣策羣力之效定謀決策共濟時艱於各府州縣遍懸招諭凡有林山名宿草澤英雄能深明韜略熟諳時務或夙嫻營陣或素習槍炮或通天文或測地輿或造營壘或精醫藥或通外邦文語或稔倭國權貴凡我食毛踐土莫不敵愾同仇自應仗劍從戎及時報效在上者勿徒務好賢之虛名貴有舉賢之實尤不可徒有求治虛文無致治實政六韜曰以官舉人按名督實選材考能量能授職令實當其名名副其實勿以事溢才而用非所長勿以才溢事而才違其用則得舉賢之道矣三略曰軍無財士不來軍無賞士不往用才之道在崇禮而重祿禮崇則智士至祿重則義士輕死故禮者士之所歸賞者士之所勸又曰香餌之下必有死魚重祿之下必有勇夫古之大有為者必能破格用才讀其書即可想見為人夫士有真偽而取舍隨之傑士庸儒不可不辨上苟不察賢愚倒置用舍失當擯一善則百善退進一惡則眾惡歸用佞禍至賊賢無功雖欲求治焉可得乎況才以格而途隘賢以求而愈多此所以欲舉真才宜先破成格也五曰延西弁以佐統帶自古明君良相莫不及汲求將材為自強之道孫子曰將者國之輔也輔周則國必強輔陳則國必弱鼂錯曰將不知兵以卒于敵君不擇將以國于敵故主將者三軍之司命也國之存亡民之生死係焉可不慎哉今夫主將之能事調度布置也羽翼主將

而殺敵效果者統領管帶之責也統帶無能則失羽翼之助兵雖多奚益哉臨人敵而無羽翼主將不能徒手而搏然觀武弁類多但鄙倜儻不學無術承平則因循粉飾有事則畏縮觀望以此為統帶其不為憤事者鮮矣古人選將之方不勝枚舉其大綱曰智信仁勇嚴以今觀之宜盡然哉韜畧技藝童而習之舉凡天文地圖測會營陣槍炮算法水陸險易歷代兵畧古今戰場各國疆域軍政得失靡不研究或誦習或操練或閱歷循序漸進自初學至統兵督隊必簡練揣摩若干年或十載或廿載小以成小大以成大各以材藝為等差非以財賄為班資也舉古今中西而鑑衡之其得失相去抑何遠哉方今防務戒嚴既乏將才又難造就亟宜延西弁為急救之計量其職在參游之間擇三十員僅為江蘇一省之用尊其爵重其祿派赴各營教習三軍弁目兵眾悉聽訓練隨時襄贊機宜輔佐統帶以補將領之不逮曩年削平髮匪未嘗不借助他山洋將華爾戈登等隨大軍征剿戰功卓著忠勇堪嘉遠人之効力中原由來尚矣况倭寇非髮逆可比自維新以來三十年中竭力拘頓甚至改正朔易服色陸兵仿德水師倣英每思於亞洲中取威定霸處心慮積覬覦朝鮮欲伺隙蠢動者非一朝一夕之故矣故常預等隊皆係久精兵今欲與之爭勝非延西弁不為功庶幾對證發藥助贊有人比所以欲統帶位宜先延西弁也六曰設團局以專責成昔人有言民可與樂成不可與慮始况舉辦團練事關守禦鄉曲小民不明大義往往勇於私闘怯於公戰一聞辦團遂妄

懷疑畏懼縮觀望雖經有司一再勸諭告以守望相助之義而誨者諄諄聽者藐藐即使一齊辦仍係烏合之眾散漫無紀所貴乎團練者以其內能詰奸究而外能助兵力也苟兵與團表裏相助若唇齒之依附則軍情聯絡而防務固曩年法人之役元目擊各團毫無實濟皆辦之不得其道也目下團練若聽董保自辦仍係虛行故事無補地方方為今之計宜統籌全局設局責成謹擬條目如左一省垣應諭籌防總局遴委司道督辦一省垣應設招賢館不論官紳士子年歲門第凡通藝術學識兼優者皆得入選擇尤為掌教教習多士儲才待用一每府設一團防府局選曉暢武機精通藝術者為府局團董一正副即委該知府為府局監督其直隸州廳作府論一每縣設一團防縣局選熟諳地圖通曉營陣者為縣局團董一正二副即委該縣為縣局監督其散州廳作縣論一凡鄉鎮市集滿三百家者設一團練公所選派鄰正董二人副董二人委所轄巡汛為稽查委員一設五局所應擇衝要險地及空曠能校場溝壘地營者不論城鎮內外一凡團練經費先從民間捐募不敷則由官撥貼一凡府縣正董係招賢館上取人員由總局札委以重責任各副董係次取人員由正董自約稟用鄉正董係下取人員鄉副董係鄉鎮原有之董均有府縣正董推薦為選用一凡府縣局各募民團五百名由董事督率並駐營兵五十名由哨弁帶領為民團之模楷團勇隨同營兵操練縣董帶一縣團勇府董帶合府團勇鄉鎮募團以百民人數為率隨地增減一各局需用差保應由地方官隨時飭派一勸募之法先由總局將辦團

情由曉諭義成詳細告示俟簡論畢將告示遍貼城鄉通衢各局高樹團練大幟然後由府縣董會同保

甲委員隨帶書役差保分給諭單按戶諄勸勿以勢迫富者出財無財出力遇有殷實富戶察其力能多助者必加意商勸或約鋪戶家長赴局會議一勸不成則再勸再勸不成則三勸務必因勸而後已此事專由官府則體尤而民疎由差保則分卑而民玩均難濟事故必官董相輔而行此外巨紳世家由地方官勸募量力捐助多多益善一凡民團計分二等一招無業民人可以時刻操練日夜輪守者月給口糧銀三員名曰常團一招有業民人僅每日抽暇操練每月按期輪守者月給工食應獎一牌名曰義團一此次辦團係上報君國下衛生民起見如每戶捐至百金以上及出義團三人者應請地方官親書急公好義字樣給以獎牌懸掛戶左捐至五百金以上者由各省總局就近詳請督撫懸給高脚獎牌一對以示鼓勵一凡文牘公務出入款項均須詳載簿書分類編冊以便查核並按期將捐款繕成清單註明各戶姓名連簿冊一併送交各該地方官稽核蓋印發貼通衢以昭信實而杜弊竇一每勇十人擇一尤者為勇長每勇長十元擇一尤者為勇頭勇頭長各給獎牌工食勇頭每月銀六元勇長四元所給獎牌內書勤能勇壯等字不論義團常團凡勤能出眾均得擢升勇長勇頭勇頭過多應另編勇隊擇尤請獎一中民情踴躍向義以致應募壯丁過於定額者可做德國陸兵規制分常備預備後備數等又可嚴其挑選以成有用師團一凡各團應用軍火由總局給發此新募民團祇可步槍隊

用以巡緝則有餘驅使禦敵則不足故所駐營兵五十名應練作炮隊酌給三十磅彈以內戰炮若干尊以厚團力而不備虞俟民團日益精練亦可改作馬炮等隊一巡查之法應參用西國巡捕章程無論城市僻壤必按分地段日夜輪班巡邏毋招搖勤稽查以察奸宄而肅閭閻各團之效不效於地方之靖不靖見之而各董之勤怠功過從此分矣一訓練各團雖以營兵為表率仍須另派教習如董事能自教尤妙勇之優劣由董察查縣鄉董之勤惰由府董監督諸董之功過由總局考核功多助祿更多請獎過多罰俸更多撤差一府正董為一府之領袖有督率各董之責縣正董為一縣之表率有稽查鄉董之責府縣正董運籌決策相度地勢責任較重各副董出勸士庶約束團眾是其專責團防妥善閭里又安皆諸董之力也官祇督成而已一地方官為監督有二益一地方官有守土之責與民同安危平日官民閼隔上下不親今以督團之故躬親撫馭民情激勵一旦有事不難有勇知方一益也二團與兵異而實同團多人眾品類不齊設滋事端頗為棘手地方官有牧民之責可隨時約束二益也一各董薪水局用府正董每月薪水銀三十六元縣正董二十四元副董十四元鄉正董十元副董八元此外勇眾工食及各項正雜用度均應從儉開支不得浪費一凡團隊應備衣幟勇頭勇長始穿號衣其勇眾等各給六尺長黃布腰巾一條 國朝尚黃故旗幟亦以黃色龍紋為主一兵團宜聯絡達各縣半月會哨之期必派大隊營兵與各民團合操作臨陣之勢設伏出奇登山涉水若平日畏難而苟安則臨時何以應變而制勝一上下

宜親睦官之於董猶心腹也以待心腹待董則食心腹之報董之於眾猶四肢也以待四肢待眾則收四肢之效每操練董必身先士卒每會哨官必親撫勇眾官董勇眾若父子兄弟一家人上下親睦款曲相通故能收殊絕之效復晚之以大義示之以利害激之以賞罰孚之以恩信編蒙雖愚有不感奮興起者乎一此次倭患雖創鉅痛深然天下之強於倭者且十倍之軍興以來我華之情弊顯然底蘊悉露昭著於天下耳目之間試問羣雄環起伺我我更有何策以馭之哉 朝廷孜孜求治故於事平之後必將鑒前車之失以大修武備故團防各局無論和戰均應設立擴而充之即為將來武備院及巡捕廳之地步邱陵川澤即高深之始基誠能防德國陸軍寓兵民間實為長治久安之計夫農隙講武古有明訓天下強兵之法莫踰於此一設局之後應公議詳細章程除刊刻成書外並繕貼各局由董事按期宣講眾聽下甯告誡可以激發人之義憤一以上諸節僅擬大畧尚多未盡之處但生思索良久以此法辦團定能奏效揆情度理決其必然敢冒昧以盡深願江蘇倡之各省隨之則不特外寇無隙可乘即內奸亦無從託足矣七曰厚兵力以固海防海防之法防口易防岸難海口形勢逼窄陸則砲臺海則水雷數十里之間可以彼此兼顧扼要布置易於為力海岸情形遼闊袤延數千里難處處設防故全恃兵艦遊弋洋面江蘇為皖贛諸省之門戶長江口係江蘇之咽喉尤為緊要雖有英人保護長江一帶之說然僅附近通商口岸而已如江北一帶隨地敵可登岸者不及保也崇明一區孤懸海外為大江之屏塞非屯重兵不可蓋崇明一有疏虞即江

南之大倉江北之海門失事而難守矣江以南自金山至寶山江以北自海門至海州迢迢千里要難隨地屯兵而尤不可不防潛行登岸循旅順遼東之故智日昨傳聞威海劉公島相繼淪陷兵艦大半損失海戰無可爭矣夫戰船予敵則彼之聲勢益壯而我之海防愈難一得一失相去遠矣此次戰事一誤於牙山失機再誤於不能扼守平壤三誤於引敵渡鴨綠江四誤於失旅順之天險五誤於不能保守威海至是而戰事尚堪問耶故可知和不得已則盡人事聽天命以守禦而已今江蘇為山東鄰省距登萊匪遙當此存亡危急之秋惟有厚集勁旅聯絡聲勢廣蒐鄉導熟習沿海路徑凡沿江海一帶無論山海濱隨時添設電線以通軍報並派用隊往來巡歷擇要路多埋地雷遇有易於登岸之處必加意防範自來守禦之法最忌彼此不相顧不可各守一隅有畛域之分無事則巡歷築壘有警則互相救應若常山之蛇首尾互救而不窮兵力分則弱合則強散則快聚則勇分合聚散之權操之在我焉顧軍實未饒兵雖眾不足恃也孫子曰軍無錙重則亡無糧食則亡無委積則亡夫糧餉軍裝兵之本也戰之資也故善用兵者必量其內度其時軍火糧食備預儲積按計遠近利於輪運以資接濟無虞竭蹶曩年美總統格蘭脫遊華力勸某相曰振興國莫若鐵路電報斯言也於今十七年矣電報之設畧能遠布各省鐵路此僅蒞臺數百里耳歐美各大邦鐵軌縱橫動輒數萬里承平則商賈輻輳脈絡貫通有事則調兵運餉頃刻百里鑿於今軍事方興調兵運餉之艱不僅追思格公之語而依徇久之焉敵由陸路來犯尚可據隘以待若以

師船潛至聲東擊西我將防不勝防所謂備左則右寡備右則左寡船駛洋面一日千里而兵不勞我軍陸行難與角逐無鐵軌之運微調往來動以時日緊急之際刻不可緩宜容過遲今海乏戰艦陸無火車僅以厚集兵力熟察地勢為自固之計亦禦敵之末着非海防上策也至本省兵艦慎勿速駛洋面為敵所乘按近日軍情僅可泊近口旁相機助擊苟布置周密遠近呼應相救若左右手不為倭人攻瑕伺隙則江蘇之幸也比所以欲固海防宜先厚兵力也八日勤訓練以備不測詩曰師干之試方叔率止征人代鼓陳師鞠旅自古治兵貴於訓練孫子計校七事六則曰士卒熟練吳起言治兵方圓坐起左右前後行止分合每變皆習乃授其兵今西軍體柔步伐與此相類明戚繼光治浙兵嚴明精銳訓練有方故勦倭有功世多稱之夫用兵之法雖一卒一馬一炮一槍不可徒傷於敵其所以勸求精練者非徒爭勝負亦以全師旅耳生嘗觀西軍步伐其齊心志若一上之令下猶身之使臂臂之使指進退左右三軍如一人賞罰明號令嚴器械銛利槍炮有準况堂堂王師安可不教而戰伏查華軍類皆將不與兵習兵不與將聯上下相隔軍心不一其操演技陣務飾觀無實際旌旗蔽日刀矛如林槍炮有聲聲洋洋盈耳實無一響可用以此禦敵何能取勝至新募勇隊大半係無賴游民訓練尤急為今之計應由西弁教習先教以體操步伐次之以槍炮陣法繼之以掘築營壘固之以恩信賞罰體操欲練步伐欲齊陣法欲熟槍炮欲準開放欲捷掘築欲速均須實事求是斷勿沿襲日僅就校場操演飾了事之陋習他如越

山涉水出奇設於行軍接應皆為兵之技藝諸藝嫻習天下無敵一藝不精覆敗無日若不嚴加整頓徒以急遽募集之眾禦彼久練之兵是驅羣羊而搏虎狼非安國攘寇之道也由統領而管帶由管帶而哨隊苟人人核實節節鉅制又何患兵之不精士卒之不練哉一旦有事如響斯應矣此所以欲備不測宜先勤訓練也九曰明賞罰以勵三軍夫賞所以存激勵罰所以示懲儆賞一則勸百罰一則儆眾故用賞莫貴乎信用罰莫貴乎必賞信罰必德威兼施而法令行三軍激勵將士用命六韜曰賞貴小罰貴大小者非薄爵祿財帛之與也謂能賞及馬監徒卒也恩賞下逮也大者非重刑誅黜降之條也謂能罰及當路權貴也刑罰上極也孫子吳宮教戰而誅王之愛姬戚繼光剿禦倭寇臨陣斬其長子是皆刑上極也昔者良將之用兵有饋醇醪者使投諸河與眾同飲而軍士願為効死者思下逮也今朝廷發官帑銀萬皮裘數萬襲以賜從征軍士恩賞下逮也及諸險失守復按律治諸將罪是刑罰上極也三軍之士有不感奮興起者乎或曰世固有賞下逮而不知感罰上極而不知儆者何也曰賞罰未明也夫所謂明者貴有本末耳曰何謂本末曰不賞之賞不罰之罰本也賞所賞罰所罰末也平日擇賢而用不賞之賞也見不賢而不用不罰之罰也本也臨時有功而賞之賞其所當賞也有過而罰之罰其所當罰也未也經曰其本亂而末治者否矣譬如有善御之王良而無知馬之孫陽棄馭驥而駕駑駘雖曰飼以膏粱而不知奮施以鞭撻而不知儆也故用兵之道貴乎知本萬事盡然得本則昌苟為無本則賞罰難行而不明孰無是非之心何以觀感而激勸此所以欲勵三軍宜先明賞罰也十曰用剛柔以合時中洪範九疇六三德二曰剛克三曰柔克三畧曰能柔能剛其國彌光能柔能強其國彌彰純柔純弱其國必削純剛純強其國必亡夫柔者心之德剛者氣之賊故曰柔者人之所助剛者人之所攻天地萬物莫不皆然神妙元微變化無常所以聖人不凝滯於物隨時處中而能與世推移老子曰弱之勝強柔之勝剛天下莫不知莫能行故曰受國之垢是謂社稷主受國不祥是為天下王今中倭構釁屈指半載餘喪師失地國辱將死豈非垢辱之極釋其大哉誠能順受其正不祥而自省則為天下之王矣自古聖君治國莫不有不測之患惟在脩身事天卑以自牧為今之計宜以柔克以剛則折今之以清流自命者說言戰矣顧不言戰之方所以制敵之策與夫可勝不可勝之道夫古人行軍首重人和不和於國不可以出軍不和於軍不可以出陣不和於陣不可以出戰不和於戰不可以決勝今者朝野上下至不和矣將聞兵頑至無能矣以至無能之軍處至不和之境末特無當於西法亦且大悖於古訓而欲師出有功克敵制勝不綦難乎苟逞一朝之忿以驅億萬生靈於水火之中置大局於不問不仁莫大焉兵法曰知彼知己百戰不殆不知彼而知己一勝一負不知彼不知己每戰必敗論者既昧敵之所以為敵及敵將從何出身敵兵何等精練又不知我之所以為我我將從何出身我兵曾否訓練所謂不知彼不知己也或曰倭人外強中乾若持之以久彼必自斃此言似是也其如我終無戰守之具何終無戰守之具

而強戰之是自速其禍也故不若見機議和以待將來昔者湯事葛文王事昆夷大之事小古人有行之者矣故雖割地不足惜賠款不足恥所可恥者世沓成風蒙蔽為事無望痛革之一日倘復因循苟且則厄羸瘠瘵日甚一日十年二十年之後當有不堪設想者矣此烈士所以撫膺大息呼天而痛哭也乘此次創鉅痛深之後朝野上下震驚之心未冷愧憤之氣未平革故鼎新易如反掌昔人有言雖有智慧不如乘勢雖有鎡基不如待時今則時勢可乘之日也時來勢至不思變計則更無可為之日中國之興衰成敗在此一舉矣所貴祈天永命脩省惕勵朝野同心上一德將富強之基不於是乎立哉試擬其綱如下

一曰借國債二曰聘西士三曰興築鐵路四曰添設電線五曰各道府設水陸武備學堂六曰各府設算學格致學堂七曰各府縣添設藝文學堂八曰各鄉鎮通設男女藝文學堂九曰講樹藝重農桑廣種百穀果木十曰搜山澤魚鹽之利十一曰開五金油煤礦產十二曰興機器工作製造百貨十三曰特設商部通商十四曰各省設律例公法十五曰各府設醫藥衛生院十六曰設洋文繙譯館十七曰設上下議政院十八曰選派成材學生出洋肄業十九曰變功令取士因材授職二十曰酌改六部則例文武官制二十一曰永革捐納成例二十二曰加官俸增兵糧二十三曰禁裁營粟嗜鴉片二十四曰廣使開謀以窺天下虛實二十五曰禁釋道廟宇師巫邪術二十六曰修改房屋道路調和一切食物以合格致養生之理以上凡二十六綱為草創之畧其間有本末難易之列至於斟酌損益克臻盡善是在執政者之隨時布置焉誠能以柔勝

剛自必轉弱為強雖利鈍在天其轉移在人苟奮興振作痛除積弊二十年後猶不能於亞洲中取威定霸者吾不信也於斯時也有德者應以柔無道者克以剛不將丕基永固天下一家復觀一道同風之郊治也哉此所以欲合時中宜善用剛柔也凡策十條前九條為目前守禦之方後一條係善後治安之策謹盥汰繕寫以呈明知土壤細流高深無補而負新之語將帥宜聞願憲台熟察明詳隨時見諸施行則天下之幸也

上張香濤制府條陳平倭事宜書

廣德朱照子久

安徽廣德州優行廩生朱照謹上書制府執事竊維天下之大勢小大衆寡強弱而已矣小不能敵大寡不能敵衆勢也不善用大而困於小不善用衆而挫於寡亦勢也然則小大衆寡有定形而強弱無定勢中國土地十倍日本人民且數十倍之物產之博財力之厚儲器之多均非最爾島國所敢望乃者禍發自彼而我與兵應之一戰而牙山走再戰而平壤潰三戰四戰而九連城鳳凰城金州旅順相繼失守今且東省告警畿輔戒嚴岌岌乎有不終日之勢者無制勝之策故也夫制勝之策無他他能自強而已能自強則我之大與衆足用彼小而寡且弱者必不敢僥倖一逞即逞焉而適以覆亡其國此其策廷臣之深謀遠慮者類能見及之顧明知之而不言或略言之而不盡則以累年積習難破籌於勢之能行不能行者太熟而利害之私又從而中奪之故憚而不敢發耳草茅求志之士則不然躬耕足以自給無求於上故所言狂直而無所依阿不知忌諱故所言深切而無所回護且言而用則國家受其利不

用於己亦無所辱故所言詳盡而無所隱忍生逢 聖朝必不罪言者以關天下之口又無所
 憚而不敢發故能奮激忠義殫智竭慮以効愚者之一得照因就試僑屬金陵自五六月來
 念天下事深切杞憂或中夜起坐或對食忘餐審計深算極心思之力以求中國自強之策
 而 九重高遠末由上聞諸王公大人前亦懷欲陳之而未得路於是稿成而復毀者數四然
 而思索旬日願為芻蕘之獻者卒不能以已也執事才貫天人學通中外膺制閫之任歷
 兩廣兩湖功業昭著卓然當代偉人今復壯節江南廣開言路照是以不度構昧妄舉當
 今急務就愚瞽所見聞譬昔所熟復者條為十通如左一破資格以用人才中國數萬里之
 地數十萬億之眾困於蕞爾島國勞師旬月而無功費財鉅萬而不勝其故何哉人才不適
 用也夫以中國之大天地之所網緝而化醇山川之所旁薄而鍾毓文教之所涵濡而陶淑
 豈遽寥佚閑絕於今之世哉困於資格無由振拔於稠人之中而奮其智勇為國家用也
 今世之用人也或以科目進或以蔭襲得或以年勞遷或以保舉升或以軍功敘或以捐納
 用其途可謂寬矣然數十年來未曾未開特拔一人如漢高之任韓信特開一科如漢武
 之舉茂材異等而內外臣工亦未有出奇計宏遠謀奮厲振發為 國家籌數千世之安
 者豈非有司拘資格以用人而未適於用者非屑屑事章句則碌碌治簿書不然則納貨
 財以進身循年格以輪叙又不然則苞苴請託濫廁於軍功保舉之途舍此數者雖有
 良平之智鯨彭之勇隨陸之辨武侯王猛之畧老死巖穴無由自達 朝右至于武

良平之智鯨彭之勇隨陸之辨武侯王猛之畧老死巖穴無由自達 朝右至于武
 之技概置勿講遇大閱則先期練習數日草草塞責為大吏者習知其然亦奉行故事所
 謂訓練簡閱不過如戲劇中傀儡而已行營統帥多係湘淮宿將似能練達軍情可恃以戰
 亂禦侮矣第承平日久買田園起第宅左投重右豔妾酒色聲妓金玉錦繡狗馬玩好替其智
 惘其神奪其氣消洩其筋力一旦有事妻子身家又繫懸於胸而不忍舍欲其身先士卒效
 命疆場此必不可得之數也近年創設海軍及外洋學習諸途宜得奇才於資格之外乃奔競
 之徒為仕宦捷徑有志之士恥出焉重以請託超遷保舉浮濫真才不免沈滯此亦徒有虛名
 未見皆能實用由斯以談直謂天下無一人才可也雖然天下豈真無才哉顧用之何如耳
 為今之計其如今京朝官三品以上及外省督撫各舉材畧武勇可任將帥者不論資格
 深淺遣往軍前效用不稱職則坐其舉主再取舊額新募兵淘汰而簡練之選年少有力
 者教以技勇每百人總為一隊較之得技精而最勇者為隊將合十隊將較之得技精而尤勇
 者為裨將合十裨將又較之擇習韜略知變化者為統將此一人技勇萬人之選而又粗知
 變化自足驅用萬人左之右之進之退之而無不唯命所謂軍中自有選將之法也然猶懼
 其謀之不臧也今郡縣各舉英達知兵者一人督撫試之得尤精者遣往軍前參議以觀其
 效且習戰事數年之後必有名將出其中海軍用人當於各炮局各兵船司事出洋學習
 子弟水師學堂武備學堂諸學生及曾游外洋士商中求之命通曉西學大臣策以兵法與

圖火輪機器駛船槍炮等事簡拔其尤試以所習稱則補充營弁必能人與事習才與職稱
以上數者皆當今用才之急務而非平日育才之大源也育才之大源則在科舉科舉者人才
盛衰之所繫也今之科舉弊亦極矣士之舉試者禮部者專重制藝長詩賦工楷書於國
計利病吏治得失贖贖如也一旦服官則舉其業存如敝屣所習非所用所用非其長欲其不
靡於宦途惡習工緣飾以濟奸利胡可得也武舉試弓矢戰陣時亦無所用之今宜鄉會改試
經論史論時務策去其限制寬其條例俾懷奇抱偉者得自獻其畢生得力於篇幅之間而上
之人亦得觀其才識之短長而議其用武則改試槍炮技勇取力健藝精者升之舉字官教以韜
畧粗明大義乃得與省試武舉必無冗濫之弊科目所取足充綠營員弁之用再開洋務進取
一途各行省設洋學局委一大吏董其事分格致測算地輿兵法火輪機器電氣化學等門有於
各種畧通二者選收入局延西人博學而精者為之師酌所學淺深給薪水俸益精究然後派
船廠炮局機器局兵船諸差果能稱任奏給官階與正途出身均務須實力奉行破從前冒濫
窳廢之積習需之歲月自有成效可觀此又事平後所當變法自強者也且夫中國之較外洋
開闢為獨先文物為獨備得天地之氣為獨中取萬物之精為獨足其於外洋諸國宜可折筭
服之乃近年來五大洲國環伺垂涎以兵資我殆無虛歲而我惟屈意買和偷旦夕安若此外無長
策者資格誤人才人才誤國家也當此之時急破資格以鼓舞天下豪傑如病手足痿痺服大
補元氣疏通百節之劑浸假精溢神生肢體自能運動庶其猶有廖也夫今不治必成痼疾

雖有盧扁無能為矣一伸軍法以作士氣兵畏敵甚於將者敗畏將甚於敵者勝將畏敵
甚於法者奔畏法甚於敵者克使勇而進者必死怯而退者可生則勇變為怯使怯而退者必
死勇而進者可生則怯變為勇勇怯無定形惟善用法者有以陰驅而潛鼓之俾之可守可戰可
勝而必不可敗夫國家養士居平則結之以恩臨敵則驅之以法商書曰爾不從誓言予則擊戮
汝罔有攸赦周書曰爾所弗助其於爾躬有戮晉文殺顛頤而破楚魏絳戮揚干而服鄭獲宜
斬莊賈而走燕晉武侯揮淚而斬馬謖周世宗擲枕而誅樊何伊古霸王未有不立法伸威震
懾士氣而有成功者也近年朝廷之於將帥盛其供張優其廩給遇慶典則不分優劣
循例而受渥寵彼猶以為未足乃舉軍糧而刻剝之虛軍額而吞蝕之購買軍械以窳廢報
新銳之價又從而侵牟之者比比皆然十數年來未嘗誅殛一人嚴為懲創若此者弊在弛法
法弛則無事易以驕有事易以亂驕則酒色聲伎膏粱綺綺消磨其精銳而氣不能振亂則張皇
首鼠逗遛規避玩愒其法令而志無所懾故軍法不立鮮有不債轍者今試觀倭人啟豐以來牙
山平壤鴨綠江大東溝之戰奮不顧身殺敵致果者能有幾人而按兵觀望中道譁潰望風
驚竄之徒指不勝屈誠將此輩一一按誅并著為令自今將士有如前諸狀副將以下督師者立
斬以徇總帥則具狀以請得報即正法軍前毋稍緩縱而各營將士有不裂眦齧牙怒髮攔臂
以致死於敵前者哉前者法人之擾唐徐二帥拿問兩提督正法軍前不日而獲諒山之捷其明
效也孫卿子曰將死鼓馭死轡百吏死職士大夫死行列言王者軍法之嚴也法嚴故退則死

於法進則死於敵均之死也與其退而死為慘辱不若進而死為忠義與其退而死法死無可
逃不若進而死敵敵尚可克人人皆欲致死以求生所以赴湯火而不辭櫻鋒刃而不懼冒矢石
而不避者法驅之也一罷厘捐以籌借款方今天下之大患在民貧而國用益匱豈二十三省之
利源至今而遽塞哉半入於外洋之股削半沒於官商之侵漁也夫入於高船者識時務之大
臣既創設製造機器鐵路礦務紡織諸局思所以挽回之也而沒於官商者卒無術焉以塞其流
且官商之所以侵漁者捐例釐金實驅之而俾之有所藉口也近世之開捐例本以濟國用之
不足然彼既以入貨得官如商賈之居物致利雖有峻法欲禁其蠹國剝民貧躓聚斂勢不
可得况捐納者多不能盡畀實在則不得不與局務差遣計其薪水亦費不貲小者無論
即如候補道員江南一省至百餘員之多他省稱是此其上耗國計下蝕民生可勝計哉至
于釐金本為補助軍餉而設至今於餉項所裨無幾徒以飽委員司事巡丁之私橐為商者頗
不便其稽查抽查然各貨物既完釐稅復供司員之需索校商亦藉以故昂其值登壘
斷而罔市利物價騰貴小民實陰受其剝蝕民貧國匱職此之由當今之時兵連禍結募
勇犒軍購船製器需款甚鉅帑藏不敷近年雖開息借洋款一途然論磅價折耗實多莫
如籌借富戶殷商為便然欲籌借款必先停捐例去釐金以塞覬覦而消怨望蓋捐例不停
人皆願出於捐而不願出於借釐金不撤則斂商民之財而無以責其樂輸今誠悉罷捐例釐
金頒戶部所議借款章程於各行省並通飭各郡縣關埠一體舉行委廉幹司員主其事

則數千百萬之款無難立致何則捐例罷積賢者既無路得官以居奇倍息雖委聚如山粟紅貫
朽而無所用國家有急必樂為毀家紓難博急公好義之美名釐金罷商民既免受煩苛歡
聲雷動勸諭借款當無不踴躍輸將况如七厘之息籌借數多復給虛銜封典以示獎勵
可為宗族交遊光寵哉至事平後還款則無憂難措近年 國家服用太侈冗官太多虛糜
之數稍加裁汰咸可省數百萬金又停捐而不停虛銜封典之例罷釐金而專擇民間有捐無益
之物從重抽捐但能認真辦理滴歸公實可與近日釐捐所入相倍旋况捐例停而貪吏少
釐金撤而物價平民受其賜百姓足君孰與不足哉一裁額兵以募新勇兵多則不精分則
不練必然之勢也今之額兵如旗綠各營口糧太薄器械太窳隸軍籍者率多羸老筋力疲倦
不任戰事不過取其充數而已滿洲向稱滿萬無敵今求如國初所謂索倫兵能於無鞍馬
背射命中者絕不可得京營兵猶為疲弱甚至造作謬語以相詬病有翰林院文章神機
營刀鎗云云以是為等而下之之列億可知也直省城汛之兵除株守汛地城門外別無所用
又零星破碎不能團聚操閱此等兵欲恃以禦敵不啻驅羣羊而鬥猛虎其不望風
而股栗膽落卒為所噬者幾何哉計中國額兵不下數十萬帑項歲費千餘萬金而實
無一用不如裁其半額優餉給利器械裁冗併營一律改為練兵費省而兵加勁可恃以守
內地而無虞更募勇丁以為戰勝攻取之用年取其少壯貌取其魁梧力取其剛猛則一
切哥老會安清道友諸匪之精壯者必將出而應募蓋彼之所以為匪者多由撤軍

遣散後無業可執流蕩至此一招入伍以軍法部署之嚴其約束勤其操練即可化劣為良
變匪為勇擊之效死于疆場水師則募沿海蛋戶及諸海寇給之軍火載以兵艘令登日本
口岸深入倭境子女玉帛恣所取掠毋禁彼必能冒險直前肆擾敵境是在為將者駕馭驅
策之有方故耳虎雖猛擾其性可使帖耳而為人坐騎蛇雖毒整訓之久可狎而玩諸股掌之
上信石天下之毒藥也用以殺蟲去風濕愈痺淋則參苓不能敵其效此所謂以賊攻賊不特可
藉以禦外侮且隱消心腹之大患廣募新勇此為急矣一選器械以習施用將不習兵以其
國予敵也兵不習器以其身予敵也故兵法必先論器自張矢刀予一變而為鎗炮外洋火器
愈出愈奇挾是以橫行海外馴入中國中國知其利也乃亦購之習之仿而造之或自出新樣
以期駕而上之炮則有格林阿姆斯脫郎克虜伯田雞炮開花炮等種鎗則有新舊毛瑟林明
敦並中國自製之快利鎗名色繁多殆難指屈夫鎗炮一種有一種之藥彈即一種有一種之施
放之法藥彈或誤則與鎗炮格格不入或大或小或長或短或鬆或緊皆不適於用則有器與
無器等中國海軍兵輪所用之炮如格林克虜伯等一艘必有數種此炮之彈或誤入他砲
則必不能開放從新取易愈覺勞費遲誤稽延多由於此陸營兵士或執毛瑟或持林明敦或
挾快利等鎗臨陣時往往有鎗與彈不合之弊蓋由常兵入伍者多係推野粗魯之夫不能一一
辨認間有一二老於兵者雖有辨認而倉卒時或信手誤携貽害匪淺况種類繁夥即營官哨
弁尚有不能盡識者哉今當就各種鎗砲中選最精銳者若干種按籍分類令其營習其種砲

習必無杆格不入之患鎗砲與士卒習必無施放不便之處他如水雷地雷及火箭火標一切禦
敵之具無一不宜精選無一不宜專習凡事專則必精精則兵與器習縱操自如收發由我揮霍
縱橫無不如志以戰必克以攻必取此器械之選所以為兵家先務也一節保甲以緝奸諜用兵
之道密其聲晦其迹神出鬼沒變化不測毋使敵人得知我之虛實強弱而後出其不意攻其
無備可以制勝故緝捕間諜兵家所先選者中國與倭接兵對壘已成敵國乃倭人奸細播散於
中國者甚多京師之內禁禦之間尚且不免津法為畿輔重地倭奸之散處者亦不乏人
他如秦天燕臺旅順及福建臺灣浙江兩廣等處所在多有而上海愈甚相與蟠結勾連偵伺
疊隙暗不消息者不一而足此時中國縱有智勇深沈之將欲出奇計或佯為欺此誘入內地或
埋伏精兵截其歸路或伏地雷以聚而殲旃或設陷阱以掩而捕執必無一倭兵中計者何則
且夫倭奸之得潛伺于中國者必有所主其由西人庇護者無難執公法以責之而托庇於華
人者則非整頓保甲極力搜查不能斷其根株而空其巢穴今兩國兵戎相見勢難博休休
有容之名以滋肘腋之患宜先下令大索毋使倭奴得有一人流寓華地見即立擒不稍徇饒
然後嚴查保甲凡有可疑概予拘案澈底根究得其窩主治以重法華人雖有貪利忘義者
欲潛匿倭奴以濟奸利而有所不敢倭奴既無由混迹內地漢奸亦不敢暗輸國情如此則軍
機不至洩漏軍實不得接濟我可以出奇計而制其死命矣一立高王以繫人心諸侯亂政

失國不能死社稷而泱顏忍恥為強虜所囚繫天子因廢黜之別立賢者以繫人心而奪敵氣理勢之當然也高麗王因權奴用事政令廢弛以致亂階使倭奴得陰肆而吞噬之計其異懦愚闇不能君國子民已可概見然而高麗數百年之社稷未可一旦夷也其忠臣義士思雪仇恥而恢復業者又不可以一日而無君也今高麗王為倭奴所執辱已四月矣倭之全據高麗地抑又兩月餘矣高麗之民不勝苛政黨人之雄傑者磨集蜂起揭竿斬木以抗倭兵莫不延頸舉踵望中國為之更立賢明之君助以大兵勸其禍亂而復奠其社稷乃數月之間中國之兵一退再退從未有議及更立高王以繫民望者遷延既久高麗黨人近逼於倭奴之威遠又疑中國之難恃其忠憤銳氣亦消挫沮喪而無餘人心散渙而不可復振高麗遂淪於左社矣為中國計急救高王宗族在中國者擇立一人為王給其費用使募兵成一軍為大兵鄉導且遣授黨人渠魁以將軍等號使急合眾攻倭兵在高麗者大兵擊其前黨人乘其後內外響應首尾交擊倭奴十萬之眾必無片甲生還高麗之復易于反掌倘執婦人之仁小不忍於前王之廢黜延留稽誤憚於更立彼將挾前王以鎮撫其民更張其國政遲之既久高王與其臣民亦將折入於倭改前之臣服於我者臣服倭奴則我中國數百年之藩封恐未易言復也一辨團練以防內訌昔士燮有言曰自非聖人外寧必有內憂此為窮兵黷武者警其言未可概論也吾謂今之天下內憂常因外患而起何以言之近來官場積習因循粉飾諱言賊盜以致哥老會匪安清道友輾轉煽惑遍地皆是雖歷年小有蠢動旋即撲滅則以外忌不作得專力制之故乃既經撲滅後不能拔根荦而絕芽孽其散布各處者仍得潛滋暗長於其間當道者遂以為晏然無事或偶然發覺而被捕獲者則又鋪張揚厲謂係某匪頭目實則是否頭目不得而知職渠魁而散費從不過粉飾之詞而已由是匪黨聯絡固結牢不可破伏戎於莽以伺隙而逞其毒今中國與倭連兵日久各處行營半調江海防守內地武備未免單弱諸匪倘乘機而起小則轉掠鄉村大則剽劫城邑烏合既眾響應愈多豕突狼奔縱橫肆擾恐內地兵力未易遽撲燎原之燄也然則知之何而可團練者勦滅土寇之良法也今急令各州縣舉行團練仿保甲法十家為牌立牌長一百家為甲立甲長五百家為保立練長五千家為鄉立團總各州縣官暨紳董總其綱旗幟刀矛悉令自備約每牌領洋鎗一管無事時家出一丁壯按期操練如閱兵法有事時由其長統率以勦寇此事各為保衛身家起見督率得人自能盡力勤捕且不糜國家餉項而內地可恃以無憂得以專力於外虜然此事宜早及諸匪未發時行之方可得力稍遲有倉卒不能受辦矣一練膽勇以用奇兵膽生於識識生於智勇生於氣氣生於智與義夫智與義非盡人可學而有也而膽勇則有練之法近來戰事與古不同相隔數里即彼此開礮我礮利則敵奔敵礮利則我却當烈燄衝突時毫不閃懾有進無退實屬不可多得故膽勇非練不為功陸軍先練其步法使能絕足奮奔一氣直前追及奔馬戰勝可以追奔逐北不使敵人漏網遇小挫亦可脫身收隊以作後圖步法既成則教以鎗炮之准頭坐作之行列一切安營布陣整散變化抄襲埋伏據險扼要等法今以日本之兵較中國食林不甚飽騰又經改作西裝後步履不甚便捷鎗炮雖多利器要亦與中國等其訓練戰陣

亦兵家常法彼所能者中國皆能之俟東省陸軍大集可恃以禦敵而無虞至于海軍仿行西法較日本稍遲又未經出洋游歷習見風濤沙線熟諳夫行駛之利鈍鎗炮之取準水道之測量占風水相去遠近平側迎截攻旁敲側擊皆未能練習精詳故前者馬江之戰與法艦相去咫尺乃竟讓彼先攻束手待斃然從此可以知所先後是為練膽之第一而究以船炮兵械不免畏縮故石浦之沈望風先遁蓋膽猶未堅也至鎮海之戰法人攻招寶山不得入而南琛南瑞兩兵船即開炮攻之得炮臺協助法船受傷而遁此為練膽之第二次今年倭人犯順高陞載兵之船為其所燬護送兵輪皆無可恃則胆猶未巨也至鴨綠江大東溝之戰倭船以十二艘來以五艘遁中國定遠鎮遠兩鐵甲與之左支右拒僅受微傷致遠一艦直與倭艘之最巨者併命是為練膽之第三次由此愈練愈堅愈練愈巨可以轉側于洪濤駭浪之中而無所驚愕拒于電激雷奔之際而無所憚矣今當取南北洋所有戰艦除防海口外悉數游弋大洋遇倭船則首擊尾應不遺餘力更募沿海漁船蛋戶或海洋通寇救其罪選其有胆勇者授以武職畀以鎗械資以船隻使率其屬為游兵往來出沒日本海面或登其口岸彼來則我走彼去則我擾亟肆以罷之多方以誤之再募善泗水勇厚其廩給使暗送魚雷至敵船下轟之或夜按火舟釘敵船木上焚之或當正兵攻擊敵船首尾時使駛魚雷火舟從兩旁而入以轟燬之神出鬼沒變化不測俾敵人防備不及應接不暇是在主軍政者廣募精練以出奇制勝而已矣 一出銳師以搗賊穴

太白陰經曰善用兵者攻其愛敵必從擄其虛敵必隨多其方敵必分疑其事敵必備之四者皆所謂致人而不致于人也日本興傾國之師占據高麗以犯我東三省中國欲保東三省不得不恢復高麗欲恢復高麗不得不以全力爭之顧以全力爭高麗不知別出奇師直搗日本巢穴日本兵數本不甚多今盡數調出國中武備空虛可知故倭王不敢安居東京遷居廣島為居中調度計亦甚畏中國乘虛以襲之也海軍迭經數戰倭艦之堅而巨者均受擊傷一時修葺不及刻下多以商船改充兵船可以禦敵之堅艦絕少中國此時急調集南北洋兵輪抽選堅利者並向泰西友邦重價購買數隻鼓輪東馳向日本海面游戈來往聲東擊西彼若以商船應敵則自送其死我兵船又鉅而小者不足相敵必張皇失措我或迎頭痛擊以盡殲之或故設疑兵使彼疲於奔命彼之海軍既為我所牽掣無暇來犯一面將中國所有兵船盡數調出再將招商局出海商船改作兵輪運載精兵數萬人電發緞舉巡登彼岸雖彼國緊要各口如長崎對馬等處海口有水雷陸岸有炮台未易唾手即得然日本四面環海口岸繁多處處可以攻擊守備較虛之處而登焉彼國中緊急必將駐高日兵陸續調回我可以躡其後而覆之其擾我東三省者深入重地糧盡援絕軍無鬥志必將束手受縛如此則高麗土地不待血戰而恢復日本島國無俟再舉而滅亡矣此十者皆當令自強之急務所以善用其大與眾者也雖使賈誼復生為今日計無以易此至於海口防堵諸法扼守炮台安置水雷魚雷等事任封圻者行之已豫備之已周可無俟照之贅論若夫臨陣決戰或合

圍或夾擊或游兵以擾之或輕騎以襲之或據險扼隘以遏其要衝或佯敗示弱誘之入網或鏖戰以挫其鋒或出奇以擾其後隨機應變因敵為謀非親歷行陣不能懸揣而臆談也執事苟原其狂妄納其壞流達之政府以塵 聖聽或不無葑菲之采焉天下幸甚

上張香帥援臺書

古文坪危顯麟玉書

竊顯麟一介書生三楚下士戎務雖云諳歷此身未膺重任軍機大事曷敢參議

惟思我

聖朝以仁厚開基山河數萬里疆宇大一統

君聖臣賢教化周詳 國祚綿長近三百載三藩之後縱有跳梁小醜竊發蠢動大軍

所向靡不克捷從無寸土之失於人即咸豐初髮匪之變勢頗猖獗城池十陷其三面

內皆為震恐兼以土匪相逆番蠻苗教各謀不軌壞我藩籬克戩日熾幾難收拾幸

雄畧之人傑畢集於一時不廿年間次第肅清醜類悉滅雖天心之厭亂抑亦我

聖朝之德徧宇宙有以感之致之也同治十三年初疆底定後天下已頌昇平方謂耕田而食

鑿井而飲長嬉遊於光天化日之下矣不料倭匪性如犬羊心同鬼蜮逞機器之奸

巧肆虎狼之心橫無端端挑釁戕官奪城生靈遭其塗炭完土殘為荒墟輒出大言以

欺侮每有不經之妄求詐言煽惑我人民重利哄誘我兵丁其行實為陰險凡有血性者

莫不髮指必與其勢不兩立何期稍失其銳甘心議和二萬萬之索而不吝全台之

割而不惜元氣剝削命脉付人此豈

聖主之意耶有裒於

國威見輕於四夷從此懷叵測萌覬覦者豈僅止倭寇而已哉天下人民無間智愚罔不

浩歎想

執事丹心貫日浩氣凌霄兩上阻和之疏又皆措手不及然觀目前大局其事尚可挽回

幸有南澳總鎮劉永福以臺南一隅之區當倭銳全軍之衆出奇制勝軍威頗振正好趁勢

夾攻以圖一朝雪憤震萬里之威懾羣魔之胆正當其時此真天與之機萬不可失倘仍

膜然視之深恐劉鎮軍兵微將寡終必為其所困萬一全臺淪陷勢必矯恣益甚難保

其不垂涎中土狼子野心何足相信果萌得隴望蜀之心即以臺灣為彼屯糧飲甲之區

咽喉扼要為其所踞進戰退守指揮如意一旦與衆大犯則邊海沿江一帶剿不勝剿

防不勝防縱使武侯復生亦當束手顯麟目覩危局情形午夜當深憂憤素仰

執事經文緯武豹畧龍韜當如何轉危為安保全疆土之處成竹羅胸必操勝算管

窺竊測何補高深然

國家多事之秋正疆場需人之會一知半解靡不甄錄是以不揣樛昧敢請援台倘蒙獲

允採而行之庶逆跋不致日熾社稷獲以奠安不勝跂望之至

上張香帥起義兵救援臺灣書

鄰水廖鏡清禹門

蓋聞國家有一時之變故即有一代之人才相救於其間自倭夷構難中土要挾百端備戰兩

年糜餉千萬卒未聞有一師一將同劉軍之提戈仗義而足以禦敵者

九重宵旰所深憂薄海臣民所飲恨此天下豪傑聞之所為撫膺而懷憤也今雖割地賠

款和于諸臣之私議並非出百寮之公忠而數百年之藩服拱手而授之他人 皇上萬不得已

之苦衷特恐內奸未除自難捍禦外侮耳非不知羣夷巨測眈眈中國者已非一日即和議局成

此不過安一時之反側非以為永奠之良謀也况台灣為中國藩籬係東南門戶臺灣一日不復

海疆一日不靖即中國一日不安此智愚所共知曾無一人籌萬全以助其力可為長太息

也雖劉軍孤守臺南獨當一面本足繫天下之望無如內絕糧餉外無援兵兼守戰之軍裝

已竭備戰之兵力又單勝則旬月難成敗則進退失據即卧龍復生要不能挽回大局倭夷

縱不能乘隙以蹈而內變實足堪虞其勢岌岌不可終日此目前之實在情形也前讀

詔書有各處撤兵之旨是 睿慮周詳明寓驕兵之術隱激天下兵民之心乃百爾臣工

羣然罔識忠義竟無一人稍釋 聖憂宏濟艱難及時補救體君心而抒民憤者聞有

一二智深謀遠之臣欲隱忍以圖功從容以戢亂而又任用匪人避名畏罪恐無以拯救 國

家於不敵倭夷既有台灣門戶一開腹心滋患雖我 國家節節設防必不能處處全保備

多力分將老財竭大犯兵家之忌倘復隱忍疑懼不特負廿年籌禦之志且啟羣夷乘機蠢

動之心恐今日之域中轉而為夷人之天下可慨也夫然竊計海內人才能膺軍國之重足挽回

天下大局者惟在憲台一人當此之時欲為權宜之計莫如借舉義兵為主上不受朝廷

節制奸雄無所攬其權下可壯劉帥聲威羣夷無由伺其隙然必擇其經濟宏深才識遠大

財氣充裕者始克膺其重任凡到一處即就地招募屯紮夷人通商等處庶幾事有熟習之

兵而於我軍有先路之導况此時人人蓄憤勇氣倍於曩昔將有致死於賊之心而謀自生兵

有致死於賊之心而勇百倍知兵宿將選列戎行遊子漁人練成勁旅乘此用之必可折衝千里

名雖顯于 宸怒實則隱慰 聖心氣伸於一隅而威遂立於天下也然後大張捷伐藉

以師出有名內可以救援臺灣外可以威震外國下可以謝過於民足弭後日之口實上可以

報仇於國亦藉截目前之覬覦且進可以戰退抵倭夷掃除醜類退可以守徐圖恢復全

國藩封即不然亦足以牽制其師使不得併力而來以增海疆之擾即使夷人利在航海

我則誘拒於陸利在火攻我則造營於野利在遠戰我則扼險出奇以靜馭動力為持久

之謀安在不可殺敵致果揚闔威於海甸以洗喪師之恥復失地之仇哉職在邊日久偵探夷

情凡敵將之強弱敵軍之伎倆敵人之往來奸細莫不灼知事關 君國時切杞憂惟大

人先天下之憂而憂力膺艱鉅知必有以懾敵胆而壯國威者職不揣冒昧竭抒愚測微忱

如蒙採納則我 高宗馭遠之宏規何難再見於今日也天下幸甚

致臺灣紳民義軍書

張羅澄

竊澄自己卯撥科公車屢蹶去歲春闈復下第時事孔棘秋七月上書政府為言籌餉練

兵之畧其第一條曰分道進兵以擾賊謂宜直搗長崎踞對馬島守鴨綠江聲東擊西使倭應接不暇卒不納而喪師失地之耗盡至仲冬憤憤出榆關所遇非人吾謀不用今正月大隊啟行莫敢趾高知其必敗遂爾辭歸天津甫十餘日某某望風先潰寃累宋帥輕身赴援而營口失而牛庄失而田莊臺又失復查天津營非常剋扣士卒離心更不足與言戰澄忿極入都欲盡列關內關外諸將帥罪狀訟之俾伏厥辜乞 國家擇一如山東李中丞者守津以轄關外無有不可克復之理乃訟牘未具而全權大臣出矣未幾旬即聞有賠兵費外不反侵地而又割臺灣之說澄遂不甘應試三月初南旋寓滬靜觀其後何如及四月上旬和議成果與所聞不異澄益無聊賴日與屠沽痛飲大罵天下無人昨讀日報所列臺事有進士邱逢甲嘯聚臺民自號東都大王鐫符曰義民之寶其次即列臺灣紳民布告中外文言言血淚不忍卒讀一腔忠義之氣浩然塞乎天地之間不禁拔劍所地曰天下尚有人哉 祖宗深仁厚澤以教以養二百餘年今上又復聖明可頌此日奸臣賣國庸臣誤國卒無有能分 宵旰憂者臺灣之割迫 皇上不得不從誰則一洩敷天之忿乎而臺紳民乃誓以死守以死戰是即 皇上去夏一遇倭船迎頭痛擊之初旨也子之事父從治命不從亂命資父事君則亦何所不可至謂乞海外各國保護此包胥之所以哭秦庭也謂權至臺政事平請命 中朝此諸葛之所以定蜀郡也雖曰以固吾圉實為天下撫公憤為天下復大仇獨所謂推擁賢者一言

不識即東都大王否澄竊有所請焉丈夫不死則已死則舉大名耳凡建義旗者正名為先名不正則言不順言不順則事不成試觀陳涉始事天下響應及自立為王天下遂爾解體今以公義而執私王吾恐豪傑裹足不前將來亦難借餉於內地為今之計急宜降黜王號但自署曰 大清盜寇大元帥明目張胆發奮為雄萬眾一心效死弗去使天下之大咸知臺為不忍負君起見於以激發其忠義之氣將有餘資者樂輸其財有異能者爭效其力矣倭人聞風喪氣不獨一臺可保由此簡動政長崎舉其國而滅之亦意計中事古之人有田一成有眾一旅遂能恢復以光前烈況地則二千里人則數百萬哉萬世不朽奇勳於是乎在請速覆教或遣介來滬而晰區區報 國之忱當不至無所自效云澄稽首頓首無任激切屏營之至

上臺灣劉大將軍書

松陵王恕階

將軍今之王猛也昔王猛不得見用於晉仕秦而秦霸候朝宗謂其心不忘晉用以仕秦者存晉此表微之論也今天下一家將軍雖見用於 朝廷以有牽制者而不能盡將軍之用至不得已而守已割之臺灣作南洋之屏蔽將軍固心乎 朝廷者也鄙人以王猛比將軍職是故也慨自中外通商江海內地徧設埠頭輪船鼓行門戶洞達為古今一大變局畢竟自是多故道咸而後為洋務糾葛幾釀大事如鴉片賠款教堂鬧案其患不一而足姑不具論其間開設疆土者如北則新疆伊犁南則越南暹羅東則琉球大半為強隣所侵占近則日人肇釁朝鮮屬國肆其憑陵既據奉天要害復勒兵費鉅款猶不足贖其貪得無已之

心至指索臺灣一島臺灣為東南重鎮其蓄意垂涎由來已久今於顛狂得志之時公然以此為要約固亦事勢所必至而何幸有將軍者忠義憤發涕泣誓師竟為朝廷守此一片土哉其初澎湖以守非人粹為所襲臺北又以淮勇內亂致日人乘隙而入相繼淪陷嗣後聞將軍軍屢以奇謀妙算連獲勝仗俘其名將燬其巨艦奪其器械復被戮生擒日兵無算日人之心驚胆落近又聞各國幫戰大敗之說其見諸滬上各報者絡繹不絕震海人民無不以手加額奔走相告稱將軍為神人也雖然將軍之功大矣將軍之危亦甚矣何則近來朝廷積弱之勢已極外洋各邦視中國如俎上肉幾人人得而宰之食之今為日人首先下箸其心已有所不甘然狼吞虎噬猶可顧而之他一旦有如將軍者起而撐持其間茫茫天壤草澤英雄所在多有安保無聞風而起者故外洋各邦視將軍如眼中釘恨不能拔而去之幫戰之說目前即屬予虛將來必有其事且臺灣為南洋要口泰西商船必由之路日人力難獨取許以得則為各國公地如上海之租界各國未有不樂從者屆時鐵甲舢板蜂擁集將軍以一旅之師外無救援內無策應其不能支持也必矣可危者此其一日日本風氣向來鎖港不與各國交通自二十年前其國君翻然改圖一切制度學習泰西勵精圖治力求振興其蓄志誠為巨測嗣即規取琉球受其節制去年春朝鮮有東學黨作亂因即復踞其國朝廷以藩屬保護輒復藉端內犯所求必得無欲不遂其兵力既鋒銳而未嘗挫折其心志亦復驕滿而慮難遏抑今猝然為將軍屢戰而鋤其銳氣竊思困虎猶鬥况日本為外洋強悍之國乎又外間乃傳

播將軍檄文有索還現據各口已償兵費毀棄條約否則移師東指云云竊恐急則生變其國君將謂台灣一日不得日本一日不安未伸外攘之威反增內顧之慮度必有卧薪嘗胆以圖報復者在中國一面業已講和更無所用其膽願即不求助外邦或且以餽國精兵跨海而來與將軍決一日之勝負一戰不已至於再戰再戰不已至於三將軍以一隅之地有限之兵其能終與抗衡而保無萬一之失乎可危者此其二即不然朝廷許割台灣固應載入和約今許而不得核與約章不符日本決不肯因而中止勢必仍向朝廷索取主和者既唯諾於前何敢辭難於後或以他處相易則內省地方處處毘連較海外孤懸者尤為吃重是易地之說固有所不便或另償賠款則前此所許三百兆萬已為從古輸幣敵國者所未有即搜括十八省之金錢恐亦不滿此數再加以後逐年起利未知何年何月可以清償款外加款恐亦必無之事是賠費之說更有所不能然其必欲得台之心且以愈難而愈迫現在威海衛旅順各口開日本仍以重兵鎮守鄙人鯁鯁過慮設或以此重兵直闖天津如咸豐年間英法故事於時滿朝之口加罪於將軍將軍其何術以自全乎即謂畿輔大兵星羅棋布日人必不敢出此萬一出其不意脅主和者被以俱來勒令到台灣當面交割則北洋精銳准師不能不隨行擁護至是而將軍不以臺地交付日本即先開戰將軍不與接戰則臺地亡將軍若與接戰或傷及主和者主和之擁護者臺地即不亡而將軍亦無以自立矣將軍既無以自立

台地亦終歸於必亡可危者此其三處三可危之地而欲籌一轉危為安之策俾台灣無恙朝廷無恙日本亦藉此俱得無恙乎鄙人不揣謏陋竊有一說焉敬為將軍陳之夫以將軍之經文緯武大畧雄才戰守機宜自有成算固非草茅下士所能窺測然壤細流高深並細愚者予慮一得或亦大君子樂為聽受乎將軍既為朝廷守已割之上尤必為朝廷全已和之局計莫如揀選樸誠幹練之員三四輩航海而北向英法德俄各國駐京大臣懇其出為議處蓋風聞中日議和之初擬償兵費二百兆萬奉天已據各口即歸日本管轄嗣俄國之東省與伊境接壤謂中國不宜應許日本中懷顧忌遂改章不願得地增兵費一百萬兆是東省已得之地可以貼贖則台灣本屬未得之地似亦儘可通融此事不能再與朝廷牽涉宜就台地生法今且通計全台地丁額租開卡出進口各貨釐金以及各項雜稅每年可得銀若干再計台地軍餉船炮器械修治城垣炮台及官吏薪俸役食並善後積儲地方一切公費每年應用銀若干與出入相較可餘若干約一適中之數以百萬金為率不足則另籌作為日本每年貼費或以一二十年為期期滿再議倘台北尚有日兵務須一律撤退如是則彼無戰守之經營却有安享之利益而得一進場地步亦不致為各國所訾笑在將軍既加禮以待強敵復有辭以謝天下竊謂計莫有善於此者懇各國大臣即以此法調議處立和約嗣後不相侵永敦和好想日本於兵大挫之後真氣已餒亦斷無不從之理也夫堂堂中國天下之大甲兵之衆尚不欲與倭相較償以兵費惟不戰而和其和難能戰而和其和易將軍能戰者也能戰而終不願以戰相尋者上全國家大局下免塗炭斯民區區片土歲與津貼不特未為失體誰不諒將軍之苦衷服將軍之大度耶一面宜將此意奏明皇上布告天下以台土之錢糧作台土之經費東正朔參朝賀承為大清不侵不叛之臣將軍固無所利於其間也且內以杜英雄藉口之端外以截強隣接踵之患於時局關係甚大此鄙人所謂守已割之臺灣作南洋之屏蔽光明磊落落將軍之心乎朝廷者如此將見功在天下名在萬世不且駕王猛而上之乎書生管見是否有當伏祈垂察俯賜採納幸甚幸甚

普天忠憤全集卷八終

普天忠憤全集卷八終

